



經籍典第四十五卷

經籍總部紀事七

宋史真宗章獻明肅劉皇后傳后性警悟曉書史聞朝廷事能紀其本末真宗退朝閱天下封奏多至中夜后皆預聞宮闈事有問輒傳引故實以對后稱制凡十一年自仁宗即位乃諭輔臣皇帝聽斷之暇宜詔名儒講習經史以輔其德於是設幄崇政殿之西廡命近臣侍講讀

仁宗楊德妃傳妃端麗機敏妙音律組紉書藝一過目如素習

度宗全皇后傳后会稽人理宗母慈憲夫人姪孫女也略涉經史

荆國大長公主傳主善筆札喜圖史能爲詩歌

宗室魏悼王廷美傳叔充

廷美元孫

藏書至萬卷子九人登科者三

德文字子

廷美第八子

少好學凡

經史百家手自抄撮工爲詞章真宗以其刻礪如諸生嘗因進見戲呼之曰五秀才宮中由是悉稱之

燕懿王德昭傳惟和字子禮雅好學爲詩頗清麗工筆札優游典籍嘗和御製詩上稱其有理致及

卒宰相王旦等錄其藁二十二軸上親製序藏于祕閣

越文惠王元傑傳元傑穎悟好學善屬辭工草隸飛白建樓貯書二萬卷

越文惠王元傑附傳宗望字子國仁宗嘗御延和殿試宗子書以宗望爲第一又常獻所爲文賜國子監書及以塗金紋羅御書好學樂善四字賜之卽所居建御書閣帝爲題其榜

濮王允讓附傳宗晟紹聖元年六月嗣濮王好古學藏書數萬卷仁宗嘉之益以國子監書

吳榮王顥傳顥天資穎異尤嗜學始就外傳每一經終卽遺講讀官以器幣服馬工飛白善射好圖書博求善本神宗嘉其志尙每得異書亟馳使以示

益端獻王顥傳顥少好學長博通羣書

王溥傳溥好學手不釋卷子貽孫字象賢太祖平吳蜀所獲文史副本分賜大臣溥好聚書至萬餘卷貽孫遍覽之

趙贊傳贊七歲誦書二十七卷應神童舉明宗詔曰都尉之子太尉之孫幼能誦書弱不好弄克彰庭訓宜錫科名

吳廷祚傳廷祚少頗好讀書宋初加同中書門下三品性至孝好學聚書萬餘卷

張昭傳昭父直以周易春秋教授學者自遠而至時號逍遙先生昭七歲能誦古樂府詠史詩百餘篇未冠徧讀九經盡通其義處儕類中緩步闊視以爲馬鄭不己若也後至贊皇遇程生者專史學以爲專究經旨不通今古率多拘滯繁而寡要若極談王霸經緯治亂非史不可因出班范漢書十餘義商確乃授昭荀紀國志等後又盡得十三史五七年間能馳騁上下數千百年事又注十代興亡論攜文數十軸謁興唐尹張憲憲家富文籍每與昭燕語講論經史要事恨相見之晚後唐天成三年以武王莊宗實錄未修詔正國節度盧質西川節度何瓚祕書監韓彥輝續錄事迹瓚上言昭有史才嘗私撰同光實錄十二卷又聞其欲撰三祖志并昭宗廟賜武皇制詔誥九十餘篇請以昭所撰送史館拜昭爲左補闕史館修撰委之撰錄昭以懿祖獻祖太祖並不踐帝位仍補爲紀年錄二十卷又撰莊宗實錄三十卷上之四年上武王以來功臣列傳三十卷以本官知制誥清泰二年召判史館兼點閱三館書籍校正添補預修明宗實錄成三十卷以獻天福五年以唐史未成詔與呂琦崔悅等續成之別置史館命昭兼判院事昭又撰唐朝君臣正論二十五卷上之開運二年秋

唐書成二百卷乾祐二年加檢校禮部尚書少帝年十九猶有童心昭上言請聽政之暇數召儒臣講論經義周廣順初拜戶部尚書顯德元年遷兵部尚書二年詔撰制旨兵法十卷又撰周祖實錄三十卷及梁鄧王均帝後唐閔帝廢帝漢隱帝五朝實錄梁二十二年祀凌遠事皆遺失遂不克修餘三帝實錄皆藏史閣詔令詳定經典釋文九經文字制科條式及問六聖所出并議三禮圖祭玉文鼎釜等昭援引經據時稱其該博宋初拜吏部尚書乾德元年封鄆國公改封陳國公昭博通學術書無不覽兼善天文風角太一卜相兵法釋老之說藏書數萬卷尤好纂述自唐晉至宋專筆削典章之任著嘉善集五十卷名臣事迹五卷

劉熙古傳熙古年十五通易詩書十九通春秋子史避祖諱不舉進士後唐長興中以三傳舉時翰林學士和凝掌貢舉熙古獻春秋極論二篇演論三篇凝甚加賞開寶五年參知政事拜戶部尚書熙古兼通陰陽象緯之述作續聿斯歌一卷六壬釋卦序例一卷集古今事迹爲歷代紀要十五卷頗精小學作切韻拾玉二篇摹刻以獻詔付國子監頒行之子蒙叟好學著五運甲子編年曆三卷盧多遜傳多遜博涉經史太祖好讀書每取書史館多遜預戒令吏白已知所取書必通夕閱覽及

太祖問書中事多遜應答無滯同列皆伏焉

李宗諤傳真宗卽位拜起居舍人預重修太祖實錄遷知制誥纂西垣集制刻石記名氏景德二年召爲翰林學士嘗著翰林雜記以紀國朝制度上之風流儒雅藏書萬卷有文集六十卷內外制三十卷嘗預修續通典大中祥符封禪汾陰記諸路圖經又作家傳談錄並行於世

賈黃中傳黃中幼聰悟方五歲父玘每旦令正立展書卷比之謂之等身書課其誦讀至道初拜禮部侍郎兼祕書監黃中素嗜文籍旣居內閣甚以爲慰有文集三十卷

張洎傳洎少有俊才博通墳典爲李煜記室賜書萬餘卷歸朝拜太子中允洎博涉經史多知典故每上有著述或賜近臣詩什洎必上表援引經傳以將順其意上因賜詩褒美有文集五十卷行於世

王顯傳太平興國八年制授樞密使上謂之曰卿世家本儒少遭亂失學今典朕機務無暇博覽羣書能熟軍戒三篇亦可以免於面牆矣因取是書及道德坊宅一區賜之子希逸字仲莊好學尤熟唐史聚書萬餘卷

陶穀傳穀強記嗜學博通經史諸子佛老咸所總覽

楊克讓傳克讓少好學手寫經籍盈於篋笥多收圖畫墨跡子希閔生而失明令諸弟讀經史一歷耳輒不復忘有集二十卷

郭廷謂傳廷謂子延澤淳化二年太宗聞延澤洎右贊善大夫董元亨皆好學博通典籍詔宰相召問經史大義皆條對稱旨命爲史館檢討歷國子周易博士詠牡丹千餘首聚圖籍萬餘卷手自刊校嘗繼元門碑志三十卷

趙延進傳延進父暉爲偏將時延進頗親學嘗與軍中少年入民家競取財賄延進獨持書數十編以歸同輩哂之至道二年拜右金吾將軍延進涉獵經史好作詩什士流以此多之

宋太初傳太初嘗著簡譚三十八篇自序略曰廣平生纂文史老釋之學嘗謂禮之中庸伯陽之自然釋氏之無爲其歸一也喜以古聖道契當世之事而患未博也忽外物觸於耳目內機發於性情因筆而簡之以備闕亡耳

畢士安傳士安年耆目眊讀書不輟手自讎校或親繕寫又精意詞翰有文集三十卷

夏竦傳竦資明敏好學自經史百家陰陽律曆外至佛老之書無不通曉召直集賢院多識古文奇字至夜以指畫膚文集一百卷

宋庠傳庠父杞嘗爲九江掾與其妻鍾禱于廬阜夢道士授以書曰以遺爾子視之小戴禮也已而庠生他日見許真君像卽夢中見者庠讀書至是不倦善正訛謬嘗校定國語撰補音三卷又輯紀年通譜區別正閏爲十二卷掖垣叢志三卷尊號錄一卷別集四十卷

宋祁傳祁預修廣業記修起居注唐書籍田記集韻又撰大樂圖二卷文集百卷

王曙傳咸平中爲羣牧判官考集古今馬政爲羣牧故事六卷上之有集四十卷周書音訓十二卷唐書備問三卷莊子旨歸三篇列子旨歸一篇戴斗奉使錄二卷集兩漢詔議四十卷

楊礪傳礪少子嵎至道初與張庶凝刊校真宗儲邸書籍

趙安仁傳安仁生而穎悟幼時執筆能大字十三通經傳大旨早以文藝稱雍熙二年登進士第補梓州權鹽院判官會國子監刻五經正義板本以安仁善楷隸遂奏留書之真宗卽位拜右正言預重修太祖實錄安仁從幸澶州會北邊請盟首命安仁撰答書又獨記太祖聘問時書式又集和好

以來事宜及采古事作戴斗懷柔錄三卷以獻以諫議大夫參知政事俄修國史大中祥符五年以兵部侍郎仍兼修史八年兼宗正卿國史成遷右丞善訓諸子各授一經尤嗜讀書所得祿賜多以購書時閱典籍手自讎校三館舊闕虞世南北堂書鈔惟安仁家有本真宗命內侍取之嘉其好古手詔褒美尤知典故凡近世典章人物之盛悉能記之有集五十卷

陳彭年傳彭年幼好學母惟一子愛之禁其夜讀書彭年篝燈密室不令母知年十三著皇綱論萬餘言爲名輩所賞嘗因京城大酺跨驢出游構賦自東華門至闕前已口占數千言直史館兼崇文院檢討又代潘慎修起居注賜緋魚獻大寶箴頌之預修冊府元龜三年遷右正言數有章建白彈射真宗令中書置籍記之大中祥符三年遷右諫議大夫兼祕書監詔編次太宗御集六年同修國史前後賜彭年御製歌詩凡六篇彭年性敏給博聞強記所得奉賜惟市書籍奉詔同編景德朝陵地里封禪汾陰三記閣門客省御史臺儀制又受詔編御集及宸章集歷代婦人文集所著文集百卷唐紀四十卷

周起傳起家藏書萬餘卷起能書弟超亦能書集古今人書并所更體法爲書苑十卷

高若訥傳若訥強學善記自秦漢以來諸傳記無不該通尤喜申韓管子之書頗明曆學因母病遂兼通醫書悉考校訛謬行之世皇祐中詔累黍定尺以制鍾律若訥依隋書定尺十五種上之有集
二十卷

張耆傳真宗在東宮嘗命授以論語左氏春秋後又賜宸戒二十條聖政記冊府元龜故頗知傳記及術數之學言象緯輒中

宋綬傳綬幼聰警爲外祖楊徽之所愛徽之無子家藏書悉與綬綬母亦知書每躬自訓教以故博通經史百家爲翰林學士兼侍讀學士勾當三班院始詔讀唐史固求解三班以顯進講同修國史史成遷工部侍郎詔定章獻明肅章懿太后祔廟禮綬援春秋考仲子之宮唐坤儀廟故事請別築宮家藏書萬餘卷親自校讎其筆札尤精妙及卒帝多取其書宇藏禁中初郊祀綬攝太僕卿帝問儀物典故占對辨洽因上所撰鹵簿圖十卷

宋敏求傳敏求家藏書三萬卷皆略誦習熟于朝廷典故士大夫疑議必就正焉所著書甚多學者多咨之

盛度傳度好學家居列圖書每歸未嘗釋手

丁度傳父逢吉以醫術事真宗藩邸然好聚書與儒者游度強力學問好讀尚書嘗擬爲書命十餘篇大中祥符初登服勤詞學科嘗獻王風論于章獻太后以戒外戚慶曆七年上慶曆兵錄五卷瞻邊錄一卷選尚書左丞卒度著邇英聖覽十卷龜鑑精義三卷編年總錄八卷奉詔領諸儒集武經總要四十卷

孫朴傳朴字夢得眉山六世祖長孺喜藏書號書樓孫氏子孫以田爲業至朴始讀書英宗卽位進戶部侍郎告老以太子少傅就第

田況傳況少卓犖有大志好讀書

田錫傳錫幼聰悟好讀書屬文太平興國三年進士高等旣居諫官卽上疏獻軍國要機者一朝廷大體者四其略曰集賢院雖有圖籍而無職官祕書省雖有職官而無圖籍臣願陛下擇才任人使各司其局此大體之二也七年知相州明年移睦州睦人舊阻禮教錫建孔子廟表請以經籍給諸生詔賜九經自是人知向學咸平三年錫奏曰陛下卽位以來治天下何道臣願以皇王之道治之

舊有御覽但記分門事類臣請鈔略四部別爲御覽三百六十卷萬機之暇日覽一卷經歲而畢又采經史要切之言爲御屏風十卷置宸座之側則治亂興亡之鑒常在目矣真宗善其言詔史館以羣書借之每成書數卷卽先進內錫先上御覽三十卷御屏風五卷嘗曰吾立朝以來章疏五十有二皆諫臣任職之常言苟獲從幸也豈可藏副示後謗時賣直耶悉命焚之所著咸平集五十卷掌禹錫傳英宗卽位自祕書監遷太子賓客御史劾禹錫老病不任事帝憐其博學強記令召至中書示以彈文禹錫惶怖自請遂以工部侍郎致仕嘗預修皇祐方域圖志地理新書奏對帝前王洙推其稽考有勞賜三品服及校正類篇神農本草載藥石之名狀爲圖經著郡國手鑑一卷周易集解十卷好儲書所記極博

王洙傳洙少聰悟博學記問過人爲國子監說書改直講授史記漢書爲天章閣侍講專讀寶訓要言於邇英閣預修崇文總目成國朝會要命撰大饗明堂記洙泛覽傳記至圖緯方技陰陽五行算數音律詁訓篆隸之學無所不通預修集韻祖宗故事三朝經武聖略鄉兵制度著易傳十卷雜文千有餘篇洙子欽臣平生爲文至多所交盡名士性嗜古藏書數萬卷手自讎正世稱善本

聶冠卿傳召試學士院校勘館閣書籍入翰林爲學士兼侍讀學士每進讀左氏春秋必引尊王黜霸之義以諷冠卿嗜學好古手未嘗釋卷尤工詩有靳春集十卷

馮元傳元幼從崔頤正孫奭爲五經大義進士中第時詔流內銓取明經者補學官元自薦通五經謝泌笑曰古治一經或至皓首子尙少能盡通耶對曰達者一以貫之更問疑義辨析無滯王旦聞其名嘗令說論語老子羣子弟侍聽因薦之眞宗試進士殿中召元講易元進說曰地天爲泰者以天地之氣交也君道至尊臣道至卑惟上下相與則可以輔相天地財成萬化帝悅天禧初數與查道李虛已李行簡入講易于宣和門北閣仁宗卽位爲直學士兼侍講與孫奭以經術並進講論自是仁宗益嚮學進龍圖閣學士預修三朝正史明道元年上金華五箴賜書褒答修景祐廣樂記書成遷戶部侍郎執親喪皆案禮變服不爲世俗齋薦遇祭日與門生對坐誦說孝經而已多識古今臺閣品式之事尤精易初七歲方讀易母夜夢異人以紺蓮華與元吞之且曰善讀此後必貴顯元且老率三日一誦易

張揆傳揆擢進士第歷大理寺丞以疾解官十年不出戶讀易因通揚雄太元經陳執中薦揆經明

行淳召爲國子監直講權三司戶部判官上所著太元集解數萬言詔對邇英閣令撰著得斷首且言斷首準易之夫蓋以陽剛決陰柔君子進小人退之象仁宗說擢天章閣待制兼侍讀一日進讀漢馬后傳因言今妃族太盛不可不裁損使保其家帝嘉納之

楊徽之傳咸平二年仍兼祕書監入謝命坐勞之曰圖書之府清淨無事俾卿得以養性也

呂文仲傳太宗暇日每從容問文仲以書史一日召於崇政殿上草書經史故實數十軸詔模刻于石

杜鎬傳鎬幼好學博貫經史太宗卽位江左舊儒多薦其能歷祕閣校理太宗觀書祕閣詢鎬經義進對稱旨判太常禮院與朱昂劉承珪編次館閣書籍改直祕閣會修太祖實錄命鎬檢討故事以備訪問景德初預脩冊府元龜鎬博聞強記凡所檢閱必戒書吏云某事某書在某卷幾行覆之一無差誤每得異書多召問之鎬必手疏本末以聞顧遇甚厚士大夫有所著述多訪以古事年踰五十猶日治經史數十卷或寓直館中四鼓則起誦春秋

彭乘傳乘字利建益州華陽人進士及第少以好學稱天禧初用寇準薦爲館閣校勘預校正南北

史隋書改祕書省著作佐郎遷本省丞集賢校理知普州蜀人得守鄉郡自乘始普人鮮知學乘爲興學召其子弟爲生員教育之歷夔州路轉運使召修起居注入翰林爲學士性純孝不喜事生業聚書萬餘卷皆手自刊校蜀中所傳書多出於乘

郎簡傳簡字叔廉杭州臨安人幼孤貧借書錄之多至成誦進士及第補試祕書省校書郎歷工部侍郎致仕

李仕衡傳子丕緒以蔭補累遷司農卿致仕居官廉靜不爲矯激家多圖書集歷代石刻數百卷藏之

胡則傳初則坐丁謂黨降知信州徙福州時前守陳絳嘗延蜀人龍昌期爲衆人講易得錢十萬絳旣坐罪遂自成都械昌期至則破械館以賓禮出俸錢爲償之昌期者嘗注易詩書論語孝經陰符經老子其說詭誕穿鑿至詆斥周公初用薦者補祕書省校書郎後以殿中丞致仕著書百餘卷嘉祐中詔取其書時年八十餘野服自詣京師賜緋魚絹百匹歐陽修言其異端害道不當推獎奪所賜服罷歸

王沿傳沿字聖源大名館陶人少治春秋中進士第試祕書省校書郎歷河北轉運使上所著春秋集傳十六卷歷天章閣待制有文集二十卷唐志二十一卷

杜杞傳杞字偉長父鎬蔭補將作監主簿歷天章閣待制知慶州杞性強記博覽書傳通陰陽術數之學有奏議十二卷

陳從易傳從易字簡夫泉州晉江人進士及第歷祕書省著作佐郎預修冊府元龜改監察御史知廣州又坐嘗課校太清樓書字非僞誤而從易妄判竄之降直史館歷龍圖閣直學士知杭州爲人好學強記著泉山集二十卷中書制藁五卷西清奏議三卷

楊大雅傳大雅字子正素好學日誦數萬言雖飲食不釋卷進士及第歷祕書丞咸平中交趾獻犀因奏賦召試遷太常博士又上書自獻所爲文復召試直集賢院以集賢院學士知亳州卒嘗因輪對上原治十七篇所著大隱集三十卷西垣集五卷職林二十卷兩漢博聞十二卷

李行簡傳行簡字從易馮翊人家貧刻志於學讀六經每至夜分寒暑不易累擢龍圖閣待制帝幸龍圖閣命讀周易歷集賢學士

古今圖書集成

李宥傳宥字仲嚴舉進士入館校勘書籍遷集賢校理

袁抗傳抗字立之南昌人舉進士累少府監喜藏書至萬卷江西士大夫家鮮及也

張盥之傳盥之字景山進士及第校勘館閣書籍遷集賢校理

唐詢傳詢字彥猷累遷給事中有集三十卷好畜硯有硯錄三卷

田京傳京字簡之舉進士歷祕書省著作佐郎頗通兵戰曆算雜家之術著天人流術通儒子十數書又有奏議

梁鼎傳鼎字凝正益州華陽人進士甲科歷御史臺嘗著隱書三卷史論二十篇學古詩五十篇王濟傳濟字巨川歷江南西路安撫使博涉經史好讀左氏春秋

楊億傳億字大年浦城人億生甫能言母以小經口授隨卽成誦年十一太宗詔試授祕書省正字務學晝夜不息真宗卽位拜左正言詔錢若水修太宗實錄奏億叅預凡八十卷而億獨草五十六卷歷翰林學士受詔注釋御集又兼史館修撰億博覽強記集當世之述作爲筆苑時文錄數千篇著括蒼武夷潁陰韓城退居汝陽蓬山冠鰲等集內外制刀筆共一百九十四卷億子絃字望